



隋書目錄

特進臣魏徵

上

隋書目錄

隋書目錄

帝紀五

志三十

列傳五十

帝紀第一卷

隋書一

帝紀

高祖上

第二卷

隋書二

帝紀

高祖下

第三卷

隋書三

帝紀

煬帝上

第四卷

隋書四

帝紀

煬帝下

第五卷

隋書五

帝紀

恭帝

志第一卷

隋書六

志

禮儀一

第二卷

隋書七

志

禮儀二

第三卷

隋書八

志

禮儀三

第四卷

隋書九

志

禮儀四

第五卷

志

禮儀五

第六卷

志

禮儀六

第七卷

志

隋書十二

禮儀七

第八卷

志

隋書十三

音樂上

第九卷

志

隋書十四

音樂中

第十卷

志

隋書十五

音樂下

第十卷

隋書十六

志

律曆上

第十二卷

隋書十七

志

律曆中

第十三卷

隋書十八

志

律曆下

第十四卷

隋書十九

志

天文上

第十五卷

隋書二十

志

天文中

第十六卷

隋書二十一

天文下

第十七卷

隋書二十二

志

五行上

第十八卷

隋書二十三

志

五行下

第十九卷

隋書二十四

志

食貨

第二十卷

隋書二十五

志

刑法

第二十一卷

隋書二十六

志

百官上

第二十二卷

隋書二十七

志

百官中

第二十三卷

隋書二十八

志

百官下

第二十四卷

隋書二十九

志

地理上

第二十五卷

隋書三十

志

地理中

第二十六卷

隋書三十一

志

地理下

第二十七卷

隋書三十二

志

經籍一經

第二十八卷

隋書三十三

志

經籍二史

第二十九卷

隋書三十四

志

經籍三子

第三十卷

隋書三十五

志

經籍四集

道經

佛經

列傳第一卷

隋書三十六

后妃傳

文獻獨孤皇后

宣華夫人陳氏

容華夫人蔡氏

煬帝蕭皇后

第二卷

隋書三十七

列傳

李穆

子軍 詢弟崇

穆兄子詢 崇子敏

梁睿

第三卷

隋書三十六

列傳

劉昉

鄭譯

柳裘

皇甫績

常慕

盧賁

第四卷

隋書三十九

列傳

于義

子宣道

宣敏

陰壽

子世師

骨儀附

竇榮定

元景山

源雄

豆盧勣

子毓 勣兄通

賀正誼

第五卷

隋書四十一

列傳

梁士彦

子剛

宇文忻

王誼

元諧

元世積

虞慶則

元冑

第六卷

隋書四十二

列傳

高熲

蘇威

子夔

第七卷

隋書四十三

列傳

李德林

第八卷

隋書四十四

列傳

河間王弘

子慶

楊處綱

楊子崇

觀德王雄

弟達

第九卷

隋書四十五

列傳

滕穆王瓚

嗣王綸

道悼王靜

衛昭王爽

嗣王集

蔡王智積

第十卷

隋書四十五

文四子傳

房陵王勇子儼

秦孝王俊子皓

庶人秀

庶人諒

第十一卷

隋書四十六

列傳

趙熒

趙芬

楊尚希

長孫平

元暉

韋師

楊昇

蘇孝慈兄子沙羅

李雄

張嬰

第十二卷

隋書四十七

列傳

韋世康

弟沈

藝

冲

從父弟壽

柳機

子述

弟旦

肅

從兄椿

亮

第十三卷

隋書四十八

列傳

楊素

弟約

從父文思

文紀

第十四卷

隋書四十九

列傳

牛弘

第十五卷

隋書五十一

列傳

宇文慶

李禮成

元孝矩 弟襄

郭榮

龐晃

李安

第十六卷

隋書五十二

列傳

長孫覽 從子熾 熾弟晟

第十七卷

隋書五十三

列傳

韓擒虎 弟僧壽 洪

賀若弼

第十八卷

隋書五十四

列傳

達奚長儒 賀婁子幹

史萬歲 劉方

第十九卷

隋書五十五

列傳

王長述 李衍

伊婁謙

田仁恭

元亨

杜整

李徹

崔彭

第二十卷

隋書五十五

列傳

杜彥

高勵

朱敞

周搖

獨孤諧

乞伏慧

張威

和洪

侯莫陳穎

第二十一卷

隋書五十六

列傳

盧愷

令狐熙

薛胄

宇文弼

張衡

楊汪

第二十二卷

隋書五十七

列傳

盧師道

從父兄昌衡

李元操

薛道衡

從弟孺

第二十三卷

隋書五十八

列傳

明克讓

魏澹

陸爽 侯白

杜臺卿

辛德源

柳詵

許善心

李文博

第二十四卷

隋書五十九

煬三子傳

元德太子昭

齊王暕

趙王杲

第二十五卷

隋書六十

列傳

崔仲方

于仲文 兄類
從父弟璽

段文振

第二十六卷

隋書六十一

列傳

宇文述

郭衍

第二十七卷

隋書六十二

列傳

王韶

元巖

劉行本

梁毗

柳或

趙綽

裴肅

第二十八卷

隋書六十三

列傳

樊子蓋

史祥

元壽

楊義臣

衛玄

劉權

第二十九卷

隋書六十四

列傳

李圓通

陳茂

張定和

張大淵

麥鐵杖

沈光

來護兒

魚俱羅

陳稜

王辯

斛斯萬壽

第三十卷

隋書六十五

列傳

周羅暉

周濩尚

李景

慕容三藏

薛世雄

王仁恭

權武

吐萬緒

董純

趙才

第三十一卷

隋書六十六

列傳

李諤

鮑宏

裴政

柳莊

源師

郎茂

高構

張虔威

榮毗

陸知命

房彥謙

第三十二卷

隋書六十七

列傳

虞世基

裴蘊

裴矩

第三十三卷

隋書六十八

列傳

宇文愷

閻毗

何稠

第三十四卷

隋書六十九

列傳

王劼

袁充

第三十五卷

隋書七十

列傳

楊玄感

李子雄
斛斯政

趙元淑
劉元振

李密

裴仁基

第三十六卷

隋書七十一

誠節傳

劉弘

皇甫誕

陶謨
敬全

游元

馮慈明

張須陁

楊善會

獨孤盛

元文都

盧楚

劉守翊

堯君素

陳孝意

張季珣

松贊

第三十七卷

隋書七十二

孝義傳

陸彥師

田德懋

薛睿

王頌

楊慶

郭雋

田翼

細回

劉仕雋

郎方貴

翟普林

李德饒

華秋

徐孝肅

第三十八卷

隋書七十三

循吏傳

梁彥光

樊叔略

趙軌

房恭懿

公孫景茂

辛公義

柳儉

劉曠

郭絢
敬肅

王伽

魏德深

第三十九卷

隋書七十四

酷吏傳

庾狄士文

田式

燕榮

趙仲卿

崔弘度

弟弘昇

元弘嗣

王文同

第四十卷

隋書七十五

儒林傳

元善

辛彥之

何妥

蕭該
包楷

房暉遠

馬光

劉焯

劉炫

褚輝
張冲

顧彪
王士籍

魯世達

第四十一卷

隋書七十六

文學傳

劉臻

王頴

崔儵

諸葛頴

孫萬壽

王貞

虞綽

王胄

庾自直

潘徽

杜正玄

弟正藏

第四十二卷

隋書七十七

隱逸傳

李士謙

崔廓

徐則

張文詡

第四十三卷

隋書七十八

藝術傳

庾季才

子質

盧太翼

耿詢

韋鼎

來和

蕭吉

楊伯醜

臨孝恭

劉祐

張胃玄

許智藏

萬寶常

第四十四卷

隋書七十九

外戚傳

獨孤羅

弟陀

蕭歸

子琮 琮弟瓌

第四十五卷

隋書八十

列女傳

蘭陵公主

南陽公主

襄城王妃

華陽王妃

譙國夫人

鄭善果母

孝女王舜

韓覬妻

陸襄母

劉昶女

鍾士雄母

孝婦覃氏

元務光母

裴倫妻

趙元楷妻

第四十六卷

隋書八十一

東夷傳

高麗

百濟

新羅

靺鞨

流求

倭國

第四十七卷

隋書八十二

南蠻傳

林邑

赤土

真臘

婆利

第四十八卷

隋書八十三

西域傳

吐谷渾

党項

高昌

康國

安國

石國

女國

焉耆

龜茲

踈勒

于闐

鎊汗

吐火羅

挹怛國

米國

史國

曹國

何國

烏那曷

穆國

波斯

漕國

附國

第四十九卷

隋書八十四

北狄傳

突厥

西突厥

鐵勒

奚

契丹

鞞鞞

室韋

第五十卷

隋書八十五

列傳

宇文文化及

弟智及

司馬德戩

裴虔通

王充

段達

隋書目錄

帝紀第一

隋書一

高祖上

特進

臣魏

徵上

高祖文皇帝姓楊氏諱堅弘農郡華陰人也漢太尉震八代孫鉉仕燕為北平太守鉉生元壽後魏代為武川鎮司馬子孫因家焉元壽生太原太守惠嘏嘏生平原太守烈烈生寧遠將軍禎禎生忠忠即皇考也皇考從周太祖起義關西賜姓普六茹氏位至柱國大司空隋國公薨贈太保謚曰桓皇妣呂氏以大統七年六月癸丑夜生高祖於馮翊般若寺紫氣充庭有尼來自河東謂皇妣曰此兒所從來甚異不可於俗間處之尼將高祖舍於別館躬自撫

養皇妣嘗抱高祖忽見頭上角出徧體鱗起皇妣大駭墜
高祖於地尼自外入見曰已驚我兒致令晚得天下為人
龍顏額上有五柱入頂目光外射有文在手曰土長上短
下沈深嚴重初入太學雖至親昵不敢狎也年十四京兆
尹薛善辟為功曹十五以太祖勲授散騎常侍車騎大將
軍儀同三司封成紀縣公十六遷驃騎大將軍加開府周
太祖見而歎曰此兒風骨不似代間人明帝即位授右小
宮伯進封大興郡公帝嘗遣善相者趙昭視之昭詭對曰
不過作柱國耳既而陰謂高祖曰公當為天下君必大誅
殺而後定善記鄙言武帝即位遷左小宮伯出為隋州刺

史進位大將軍後徵還遇皇妣寢疾三年晝夜不離左右
代稱純孝宇文護執政尤忌高祖屢將害焉大將軍侯伏
侯壽等匡護得免其後襲竇隋國公武帝娉高祖長女為
皇太子妃益加禮重齊王憲言於帝曰普六茹堅相貌非
常臣每見之不覺自失恐非人下請早除之帝曰此止可
為將耳內史王軌驟言於帝曰皇太子非社稷主普六茹
堅貌有反相帝不悅曰必天命有在將若之何高祖甚懼
深自晦匿建德中率水軍三萬破齊師於河橋明年從帝
平齊進位柱國宇文憲破齊任城王高潛於冀州除定州
總管先是定州城西門夕閉不行齊文宣帝時或請開之

以便行路帝不許曰當有聖人來啓之及高祖至而開焉
莫不驚異尋轉亳州總管宣帝即位以后父徵拜上柱國
大司馬大象初遷大後丞右司武俄轉大前疑每巡幸恒
委居守時帝爲刑經聖制其法深刻高祖以法令滋章非
興化之道切諫不納高祖位望益隆帝頗以爲忌帝有四
幸姬並爲皇后諸家爭寵數相毀譖帝每忿怒謂后曰必
族滅爾家因召高祖命左右曰若色動即殺之高祖既至
容色自若乃止大象二年五月以高祖爲揚州總管將發
暴有足疾不果行乙未帝崩時靜帝幼冲未能親理政事
內史上大夫鄭譯御正大夫劉昉以高祖皇后之父衆望

所歸遂矯詔引高祖入總朝政都督內外諸軍事周氏諸
王在藩者高祖悉恐其生變稱趙王招將嫁女於突厥爲
詞以徵之丁未發喪庚戌周帝拜高祖假黃鉞左大丞相
百官總已而聽焉以正陽宮爲丞相府以鄭譯爲長史劉
昉爲司馬具置寮佐宣帝時刑政苛酷羣心崩駭莫有固
志至是高祖大崇惠政法令清簡躬履節儉天下悅之六
月趙王招陳王純越王達代王盛滕王道並至于長安相
州總管尉遲迥自以重臣宿將志不能平遂舉兵東夏趙
魏之士從者若流旬日之間衆至十餘萬又宇文冑以榮
州石孫以建州席毗以沛郡毗弟義羅以兗州皆應於迥

迥遣子質於陳請援高祖命上柱國鄭國公韋孝寬討之
雍州牧畢王賢及趙陳等五王以天下之望歸於高祖因
謀作亂高祖執賢斬之寢趙王等之罪因詔五王劔履上
殿入朝不趨用安其心七月陳將陳紀蕭摩訶等寇廣陵
吳州總管于顛轉擊破之廣陵人杜喬生聚眾反刺史元
義討平之韋孝寬破尉遲迥於相州傳首闕下餘黨悉平
初迥之亂也鄭州總管司馬消難據州響應淮南州縣多
同之命襄州總管王誼討之消難奔陳荆郢羣蠻棄蠻作
亂命亳州總管賀若誼討平之先是上柱國王謙為益州
總管既見幼主在位政由高祖遂起巴蜀之眾以匡復為

辭高祖方以東夏山南為事未遑致討謙進兵屯劔閣陷
始州至是乃命行軍元帥上柱國梁睿討平之傳首闕下
巴蜀阻險人好為亂於是更開平道毀劔閣之路立銘垂
誡焉五王陰謀滋甚高祖齎酒肴以造趙王第欲觀所為
趙王伏甲以宴高祖高祖幾危賴元胄以濟語在胄傳於
是誅趙王招越王盛九月以世子勇為洛州總管東京小
冢宰壬子周帝詔曰假黃鉞使持節左丞相都督內外
諸軍事上柱國大冢宰隋國公堅感山河之靈應星辰之
氣道高雅俗德協幽顯釋巾登仕摺紳傾屬開物成務朝
野承風受詔先皇弼諧寡薄合天地而生萬物順陰陽而

撫四夷近者內有艱虞外聞妖寇以鷹鷂之志運帷帳之謀行兩觀之誅掃萬里之外遐邇清肅實所賴焉四海之廣百官之富俱稟天訓咸饗至道治定功成棟梁斯託神猷盛德莫二於時可授大丞相罷左右丞相之官餘如故冬十月壬申詔贈高祖曾祖烈為柱國太保都督徐充等十州諸軍事徐州刺史隋國公謚曰康祖禎為柱國太傅都督陝蒲等十三州諸軍事同州刺史隋國公謚曰獻考忠為上柱國太師大冢宰都督襄定等十三州諸軍事雍州牧誅陳王純癸酉上柱國鄭國公暉孝寬卒十一月辛未誅代王達滕王道十二月甲子周帝詔曰天大地大合

其德者聖人一陰二陽調其氣者上宰所以降神載挺陶鑄羣生代蒼蒼之工成巍巍之業假黃鉞使持節大丞相都督內外諸軍事上柱國大冢宰隋國公應百代之期當千齡之運家隆台鼎之盛門有翊贊之勤心同伊尹必致堯舜情類孔丘憲章文武爰初入仕風流映世公卿仰其軌物摺紳謂為師表入處禁闈出居藩政芳猷茂績問望彌遠往平東夏人情未安燕南趙北實為天府擁節杖旄任當連率柔之以德導之以禮畏之若神仰之若日芳風美迹歌頌獨存淮海榛蕪多歷年代作鎮南鄙選眾惟賢威震殊俗化行黔首任掌鉤陳職司邦政國之大事朝寄

更深鑿駕巡遊留臺務廣周公陝西之任僅可為倫漢臣
關內之重未足相況及天崩地坼先帝升遐朕以眇年奄
經荼毒親受顧命保乂皇家姦人乘隙潛圖宗社無君之
意已成竊發之期有日英規潛運大略川迴匡國庇人罪
人斯得兩河遘亂三魏稱兵半天之下洶洶鼎沸祖宗之
基已慮生人之命將怠安陸休豐南通吳越蜂飛萬虫聚江
漢騷然巴蜀鴟張翻將問鼎秦塗更阻漢門重閉畫籌惟
帳建出師車諸將稟其謀壯士感其義不違時日咸得清
蕩九功遠被七德允諧百僚師師四門穆穆光景照臨之
地風雲去來之所允武允文幽明同德驟山驟水遐邇歸

心使朕繼踵上皇無為以洽聲高宇宙道格天壤伊尹輔
殷霍光佐漢方之惠如也昔營丘曲阜地多諸國重耳小
白錫用殊禮蕭肅何優贊拜之儀番君越公侯之爵姬劉以
降代有令謨宜崇典禮憲章自昔可授相國總百揆去都
督內外諸軍事大冢宰之號進公爵為王以隋州之崇業
鄆州之安陸城陽溫州之宜人應州之平靖上明順州之
淮南士州之永川昌州之廣昌安昌申州之義陽淮安息
州之新蔡建安豫州之汝南臨穎廣寧初安蔡州之蔡陽
郢州之漢東二十郡為隋國劔履上殿入朝不趨贊拜不
名備九錫之禮加璽綬遠遊冠相國印綠綬綬位在諸侯

王上隋國置丞相已下一依舊式高祖并讓不許乃受王
爵十郡而已詔進皇祖考爵並為王夫人為王妃辛巳司
馬消難以陳師寇江州刺史成休寧擊却之大定元年春
二月壬子今日已前賜姓皆復其舊是日周帝詔曰伊周
作輔不辭殊禮之錫桓文為霸允應異物之典所以表格
天之勲彰不代之業相國隋王前加典策式昭大禮固守謙
光絲言未綽宜申顯命一如往日王功必先人賞存後已退
讓為本誠珥朕意宜命百辟盡詣王宮衆心克感必令允
納如有表奏勿復通聞癸丑文武百官詣閣敦勸高祖乃
受甲寅策曰咨爾假黃鉞使持節大丞相都督內外諸軍

事上柱國大冢宰隋王天覆地載藉人事以財成日往月
來由王道而盈具五氣陶鑄萬物流形誰代上玄之工斯
則大聖而已曰惟先正翊亮皇朝種德積善載誕上相精
采不代風骨異人匡國濟時除凶撥亂百神奉職萬國宅
心殷相以先知悟人周輔乃弘道於代方斯蔑如也今將
授王典禮其敬聽朕命朕以不德早承丕緒上靈降禍夙
遭愍凶妖醜覲密圖社稷宮省之內疑慮驚心公受命
先皇志在匡弼輯誦內外潛運機衡姦人懍懼謀用不顯
俾贅旒之危為太山之固是公重造皇室作霸之基也伊
我祖考之代任寄已深今掌禁兵外司藩政文經武畧及

播朝野戎軒大舉長驅晉魏平陽雲龍之勢其部耀豹
豹之威初平東夏人情未厭叢臺之北易水之南西距并
陘東至滄海比數千里舉袂如帷委以連城建旌杖節教
因其俗刑用輕典如泥從印猶草隨風此又公之功也兵
越不賓多歷年代淮海之外時非國有愛整其旅出鎮於
亳武以威物文以懷遠羣盜自奔外戶不閉人黎慕義
負而歸自北之風化行南國此又公之功也宣帝御寓生
重宗臣入典八屯外司九代禁衛勤巡警之務治兵得蒐
狩之禮此又公之功也鑿駕遊幸頻委留臺文武注意軍
國諮稟萬事咸理反顧無憂此又公之功也朕在諒闇公

實總已磐石之宗姦回者衆招引無賴連結羣小佞者國
哀甫爾已創陰謀積惡數旬昆吾方稔泣誅整甸宗廟以
寧此又公之功也尉迴猖狂稱兵鄴邑欲長戟而指北闕
強弩而圍南斗憑陵三魏之間震驚九州之半聚徒百萬
悉成蛇豕淇水洹水一飲而竭人之死生繫繫凶豎壽之
長短不由司命公乃戒彼鷹揚出車練卒誓誓倉兕於河朔
建旆水於東山口授兵書早畫行陣量敵制勝指日寇期
諸將遵其成旨壯士感其大義輕死忘生轉鬪千里旗鼓
奮發如火燎毛玄黃變漳河之水京觀比爵臺之峻百城
氛祲一旦廓清此又公之功也青土連率跨據東秦藉負

海之饒倚連山之險望三輔而將逐鹿指六國而願連雞
風雨之兵助鬼爲虐本根旣拔枝葉自殞屈法申恩示以
大信此又公之功也申部殘賊充斥一隅蠅飛蟻聚攻州
略地播以玄澤迷更知反服而捨之無費遺鏃此又公之
功也宇文胄親則宗枝外藩巖邑影響鄴賊有同就燥迫
脅吏人叛換城戍偏師討賊遂入網羅束之武牢有同囚
囹事窮將軍如伏國刑此又公之功也檀讓席毗擁衆河
外陳韓梁鄭宋衛鄒魯和漢梟獍之墟人庶爲豺狼之餌強
以陵弱大則吞小城有書閉巷無行人授律出師隨機掃
定讓旣授首毗亦梟豸愆此又公之功也司馬消難與國親

姻作鎮安陸性多嗜欲意好貪聚屬城子女劫掠靡餘部入
貨財多少且罄擅誅刺舉之使專殺儀台之臣懼罪畏威
動而內爨蠶食郡縣鳩毒華夷聞有王師自投南裔帝唐
崇山之罰僅可方此大漢流禦之刑是亦相匹逋逃入藪
荆郢用安此又公之功也王謙在蜀翻爲厲階閉劔閣之
門塞靈關之宇自謂五丁復起萬夫莫向分閫推轂嘗不
踰時風馳席卷一舉大定擒斬兇惡掃地無遺此又公之
功也陳頊因循僞業自擅金陵屢遣醜徒趲起江北公指
麾藩鎮無不摧殄方置文深之柱非止尉佗之拜此又公
之功也公有濟天下之勤重之以明德始於辟命屈已登

庸素業清徽聲掩廊廟雄規神略氣蓋朝野序百揆而穆
四門恥一匡之舉九合尊賢崇德尚齒貴功錄舊旌善興
亡繼絕寬猛相濟彛倫攸叙敦睦帝親宗獎王室星象不
拆陰陽自調玄冥祝融如奉太公之召雨師風伯似應成
王之宰祥風嘉氣觸石搖林瑞獸異禽遊園鳴閣至功至
德可大可久盡品物之和究杳冥之極朕又聞之昔者明
王設官胙土營丘四履得征五侯參墟龍章異其禮物故
藩屏作固垂拱責成沉嘿巖廊不下堂席公道高往烈賞
薄前王朕以眇身託于兆人之上求諸故實甚用懼焉往
加大典憲章在昔謙以自牧未應朝禮日月不居便已隔

歲時談物議其謂朕何今進授相國總百揆以申州之義
陽等二十郡為隋國今命使持節太傅上柱國杞國公椿
大宗伯大將軍金城公趙瑒授相國印綬相國禮絕百辟
任揔群官舊職常典宜與事革昔堯臣太尉舜佐司空姬
旦相周霍光輔漢不居藩國唯在天朝其以相國總百揆
去衆號焉上所假節大丞相大冢宰印綬又加九錫其敬
聽朕後命以公執律脩德慎獄恤刑為其訓範人無異志
是用錫公大輅戎輅各一玄牡二駟公勤心地利所寶人
天崇本務農公私殷阜是用錫公衮冕之服赤舄副焉公
樂以移風雅以變俗遐邇胥悅天地咸和是用錫公軒懸

之樂六佾之舞公仁風德教覃及海隅荒忽幽遐迴首內
向是用錫公朱戶以居公水鏡人倫銓衡庶職能官流詠
遺賢必舉是用錫公納陛以登公執鈞於內正性率下犯
義無禮罔不屏黜是用錫公武賁之士三百人公元本闕
是用錫公鈇鉞各一公威嚴夏日精厲秋霜猾夏必誅顧
眄天壤掃清姦宄折衝無外是用錫公彤弓一彤矢百盧
弓十盧矢千惟公孝通神明肅恭祀典尊嚴如在情切幽
明是用錫公秬鬯一卣珪瓚副焉隋國置丞相以下一遵
舊式往欽哉其敬循往策祗服大典簡恤爾庶功對揚我
太祖之休命於是建臺置官景辰詔王冕十有二旒建天

子旌旗出警入蹕乘金根車駕六馬備五時副車置旄頭
雲罕樂舞八佾設鍾虡宮懸王妃為王后長子為太子前
後三讓乃受俄而周帝以眾望有歸乃下詔曰元氣肇闢
樹之以君有命不恆所輔惟德天心人事選賢與能盡四
海而樂推非一人而獨有周德將盡妖孽遞生骨肉多虞
藩維構釁影鄉音同惡過半區宇或小或大圖帝圖王則我
祖宗之業不絕如線相國隋王睿聖自天英華獨秀刑法
與禮儀同運文德共武功俱遠愛萬物其如己任兆庶以
為憂手運璣衡躬命將士克夷姦宄刷蕩氛祲化通冠帶
威震幽遐虞舜之大功二十未足相比姬發之合位三五

豈可足論况木行已謝火運既興河洛出革命之符星辰表代終之象煙雲改色笙簧變音獄訟咸歸謳歌盡至且天地合德日月貞明故以稱大為王照臨下土朕雖寡昧未達變通幽顯之情皎然易識今便祇順天命出遜別宮禪位於隋一依唐虞漢魏故事高祖三讓不許遣兼太傅上柱國杞國公椿奉冊曰咨爾相國隋王粵若上古之初爰啟清濁降符授聖為天下君事上帝而理兆人和百靈而利萬物非以區寓之富未以宸極為尊大庭軒轅以前驪連赫胥之日咸以無為無欲不將不迎遐哉其詳不可聞已厥有載籍遺文可觀聖莫逾於堯美未過於舜堯得太

尉已作運衡之篇舜遇司空便叙精華之竭彼褰裳脫屣貳宮設饗百辟歸禹若帝之初斯蓋上則天時不敢不授下祇天命不可不受湯代於夏武革於殷干戈揖讓雖復異揆應天順人其道靡異自漢迄晉有魏至周天曆逐獄訟之歸神鼎隨謳歌之去道高者稱帝祿盡者不王與夫文祖神宗無以別也周德將盡禍難頻興宗威姦回咸將竊發顧瞻宮闕將圖宗社藩維連率逆亂相尋搖蕩三方不合如礪蛇行鳥攫投足無所王受天明命叡德在躬救頽運之艱匡墜地之業拯大川之溺撲燎原之火除羣凶於城社廓妖氛於遠服至德合於造化神用洽於天壤八

極九野萬方四裔圓首方足罔不樂推往歲長星夜掃經
天書見八風比夏后之作五緯同漢帝之聚除舊之徵昭
然在上近者赤雀降祉多龜効靈鍾石變音蛟魚出穴布
新之既煥焉在下九區歸徃百靈協贊人神屬望我不獨
知仰祇皇靈俯順人願全敬以帝位禪於爾躬天祚告窮
天祿永終於戲王宜允執厥和儀刑典訓升圓丘而敬蒼
昊御皇極而撫黔黎副率土之心恢無疆之祚可不盛歟
遣太宗伯大將軍金城公趙興奉皇帝爾玉紱百官勸進高
祖乃受焉

開皇元年二月甲子上自相府常服入宮備禮即皇帝位
於臨光殿設壇於南郊遣使柴燎告天是日告廟大赦改
元京師慶雲見易周氏官儀依漢魏之舊以柱國相國司
馬渤海郡公高頴為尚書左僕射兼納言相國司錄沁源
縣公虞慶則為內史監兼吏部尚書相國內郎咸安縣男
李德林為內史令上開府漢安縣公韋世康為禮部尚書
上開府義寧縣公元暉為都官尚書開府民部尚書昌國
縣公元巖為兵部尚書上儀同司宗長孫毗為工部尚書
上儀同司會楊尚希為度支尚書上柱國雍州牧邦國公
楊惠為左衛大將軍乙丑追尊皇考為武元皇帝廟號太
祖皇妣為元明皇后遣八使巡省風俗景寅修廟社立王

后獨孤氏爲皇后王太子勇爲皇太子丁卯以大將軍金城郡公趙叟爲尚書右僕射上開府濟陽侯伊婁彥恭爲左武侯大將軍己巳以周帝爲介國公邑五千戶爲隋室賓旌旗車服禮樂一如其舊上書不爲表表不稱詔周氏諸王盡降爲公辛未以皇弟同安郡公爽爲雍州牧乙亥封皇弟邵國公慧爲滕王同安公爽爲衛王皇子鴈門公廣爲晉王俊爲秦王秀爲越王諒爲漢王以上柱國并州總管申國公李穆爲太師上柱國鄧國公實熾爲太傅上柱國幽州總管任國公子翼爲太尉觀國公田仁恭爲太子太師武德郡公柳敏爲太子太保濟南郡公孫恕爲

太子少傅開府蘇威爲太子少保丁丑以晉王廣爲并州總管以陳留郡公楊智積爲客主興城郡公楊靜爲道王戊寅以官牛五千頭分賜貧人二月辛巳高平復赤雀太原獲蒼鳥長安獲白雀各一宣仁門槐樹連理衆枝內附壬午白狼國獻方物甲申太白晝見乙酉又晝見以上柱國元景山爲安州總管丁亥詔大馬器玩口味不得獻上戊子弛山澤之禁以上開府當真縣公賀若弼爲楚州總管和州刺史新義縣公韓擒爲廬州總管己丑蓋屋縣獻連理樹植之宮庭辛卯以上柱國神武郡公實毅爲定州總管戊戌以太子少保蘇威兼納言吏部尚書餘官如故

庚子詔曰自古帝王受終革代建侯錫爵多與運遷朕應
錄受圖君臨海內載懷洽革事有不同然則前帝後王俱
在兼濟立功立事爵賞仍行苟利於時其致一揆何謂物
我之異無計今古之殊其前代品爵悉可依舊丁未梁主
蕭歸使其大宰蕭巖司空劉義來賀四月辛巳大赦壬午
太白歲星晝見戊戌太常散樂並放為百姓禁雜樂百戲
辛丑陳散騎常侍韋鼎惠通直散騎常侍王瑳來聘于周
至而上巳受禪致之介國是月發稽胡修築長城二旬而
罷五月戊子封邗國公揚雄為廣平王永康郡公楊弘為
河間王辛未介國公薨上舉哀於朝堂以其族人洛嗣焉

六月癸未詔以初受天命赤雀降祥五德相生赤為火色
其郊及社廟衣服冕之儀而朝會之服旗幟犧牲盡令尚
赤戎服以黃秋七月乙卯上始服黃百寮畢賀庚午靺鞨
酋長貢方物八月壬午廢東京官突厥阿波可汗遣使貢
方物甲午遣行軍元帥樂安公元諧擊吐谷渾於青海破
而降之九月戊申戰亡之家遣使賑給庚午陳將周羅暉
攻陷胡野蕭摩訶寇江北辛未以越王秀為益州總管改
封為蜀王壬申以上柱國薛國公長孫覽上柱國宋安公
元景山並為行軍元帥以伐陳仍命尚書左僕射高祖節
度諸軍突厥沙鉢略可汗遣使貢方物是月行五銖錢冬

十月乙酉自濟王扶餘昌遣使來賀授昌上開府儀同三司帶方郡公戊子行新律壬辰行幸歧州十一月乙卯以永昌郡公竇榮定爲右武侯大將軍丁卯遣兼散騎侍郎鄭撝使於陳己巳有流星聲如墮牆光燭于地十二月戊寅以申州刺史爾朱敞爲金州總管甲申以禮部尚書韋世康爲吏部尚書己丑以柱國元袞爲鄜州總管興執部公衛玄爲淮州總管庚子至自歧州壬寅高麗王高陽使朝貢授陽大將軍遼東郡公太子大保柳敏卒

二年春正月癸丑辛上柱國王誼弟庚申幸安成長公主第陳宣帝殂子收寶立辛酉置河北道行臺尚書省於并

州以晉王廣爲尚書令置河南道行臺尚書省於洛州以秦王俊爲尚書令置西南道行臺尚書省於益州以蜀王秀爲尚書令戊辰陳遣使請和歸我胡墅辛未高麗百濟並遣使貢方物甲戌詔舉賢良二月己丑詔高頰等班師庚寅以晉王廣爲左武衛大將軍秦王俊爲右武衛大將軍餘官並如故辛卯幸趙國公獨孤陀第庚子京師雨土三月戊申開渠引杜陽水於三時原四月丁丑以寧州刺史竇榮定爲左武侯大將軍庚寅大將軍韓僧壽破突厥於雞頭山上柱國李充破突厥於河北山五月戊申以上柱國開府長孫平爲度支尚書己酉皇上親省囚徒其日

大雨已未高寶寧寇平州突厥入長城庚申以豫州刺史
皇甫績為都官尚書壬戌大尉任國公于翼薨甲子改傳
國璽曰受命璽六月壬午以太府卿蘇孝慈為兵部尚書
雍州牧衛王爽為原州總管甲申使使弔於陳國乙酉上
柱國李充破突厥於馬邑戊子以上柱國叱李長義為蘭
州總管辛卯以上開府爾朱敞為徐州總管景申詔曰朕
祇奉上玄君臨萬國屬生人之敝處前代之宮常以為作
之者勞居之者逸改創之重志未遑也而王公大臣陳謀
獻策咸云羨農以降至千姬劉有當代而屢遷無革命而
不徙曹馬之後時見因循乃末代之宜安非往聖之宏義

此城從漢彫殘日夕屢為戰場舊經喪亂今之宮室事近
權宜又非謀筮從龜瞻星揆日不足建皇王之邑合大眾
所聚論變通之數具幽顯之情同心固請詞情深切然則
京師百官之府四海歸向非朕一人之所獨有苟利於物
其可違乎且殷之五遷恐人盡死是則以吉凶之士制長
短之命謀新去故如農望秋雖暫劬勞其究安宅今區宇
寧一陰陽順序安安以遷勿懷胥怨龍首山川原秀麗卉
物滋阜卜食相土宜建都邑定鼎之基永固無窮之業在
斯公私府宅規模遠近營構資費隨事條奏仍詔左僕
射高潁將作大匠劉龍鉅鹿郡侯賀婁子幹太府少卿高

龍義等創造新都秋八月癸巳以左武侯大將軍竇榮定
爲秦州總管十月癸酉皇太子勇屯兵咸陽以備胡庚寅
上疾愈享百寮於觀德殿賜錢帛皆任其自取盡力而
出辛卯以營新都副監賀婁子幹爲工部尚書十一月景
午高麗遣使獻方物十二月辛未上講武於後園甲戌上
柱國竇毅卒景子名新都曰大興城乙酉遣沁源公虞慶
則屯弘化備胡突厥寇周槃行軍總管達奚長儒擊之爲
虜所敗景戌賜國子生經明者束帛丁亥親錄囚徒

三年春正月庚子將入新都大赦天下禁大刀長稍癸亥
高麗遣使來朝二月己巳朔日有蝕之壬申宴北道勳人

癸酉陳遣兼散騎常侍賀徹兼通直散騎常侍蕭褒來聘
突厥寇邊甲戌涇陽獲毛龜癸未以左衛大將軍李禮成
爲右武衛大將軍三月丁未上柱國鮮虞縣公謝慶恩卒
己酉以上柱國達奚長儒爲蘭州總管景辰雨常服入新
都京師醴泉出丁巳詔購求遺書於天下庚申宴百寮班
賜各有差癸亥城榆關夏四月己巳上柱國建平郡公子
義卒庚午吐谷渾寇臨洮洮州刺史皮子信死之辛未高
麗遣使來朝壬申以尚書右僕射趙貺兼內史令丁丑以
滕三瓚爲雍州牧己卯衛王爽破突厥於白道庚辰行軍
總管陰壽破高寶蓋於黃龍甲申早上親祈雨於國城之

西南景戌詔天下勸學行禮以濟北郡公梁遠爲汶州總管已丑陳郢州城主張子譏遣使請降上以和好不納辛卯遣兼散騎常侍薛舒兼通直散騎常侍王劭使於陳癸巳上親雩甲午突厥遣使來朝五月癸卯行軍總管李晃破突厥於摩那渡口甲辰高麗遣使來朝乙巳梁太子蕭琮來賀遷都丁未靺鞨貢方物戊申幽州總管陰壽卒辛酉有事於方澤壬戌行軍元帥竇榮定破突厥及吐谷渾於涼州景寅赦黃龍死罪已下六月庚午以衛王爽子集爲遂安郡王戊寅突厥遣使請和庚辰行軍總管梁遠破吐谷渾於爾汗山斬其名王壬申以晉州刺史燕榮爲青

州總管己丑以河間王弘爲寧州總管乙未辛亥成長公主第秋七月辛丑以豫州刺史周搖爲幽州總管壬戌詔曰行仁蹈義名教所先厲俗敦風宜見褒獎往者山東河表經此妖亂孤城遠守多不自全濟陰太守杜猷身陷賊徒命懸寇手郡省事范臺致傾產營護免其戮辱眷言誠節實有可嘉宜超恒賞用明沮勸臺致可大都督假湘州刺史丁卯日有蝕之八月丁丑靺鞨貢方物己卯以右武衛大將軍李禮成爲襄州總管壬午遣尚書左僕射高顯出靈州道內史監虞慶則出原州道並爲行軍元帥以擊胡戊子上有事於太社九月壬子幸城東觀稼穀癸丑大

赦天下冬十月甲戌廢河南道行臺省以秦王俊爲秦州總管十一月己酉發使巡省風俗因下詔曰朕君臨區宇深思治術欲使生人從化以德代刑求草萊之善旌閭里之行民間情僞咸欲備聞已詔使人所在賑恤揚鑣分路將遍四海必令爲朕耳目如有文武才用未爲時知宜以禮發遣朕將銓擢其有志節高妙越等超倫亦仰使人就加旌異令一行一善獎勸於人遠近官司遐邇風俗巨細必紀還日奏聞庶使不出戶庭坐知萬里庚辰陳遣散騎常侍周墳通直散騎常侍表彥來聘陳主知上之貌異世人使彥畫像持去甲午罷天下諸郡閏十二月乙卯遣兼

散騎常侍唐令則通直散騎常侍魏澹使於陳戊午以上柱國竇榮定爲右武衛大將軍刑部尚書蘇威爲民部尚書○四年春正月甲子日有蝕之己巳有事於太廟辛未有事於南郊壬申梁主蕭巋來朝甲戌大射於北苑十日而罷壬午齊州水辛卯渝州獲獸似麋一角同蹄壬辰班新曆二月乙巳上餞梁主於霸上丁未靺鞨貢方物突厥蘇尼部男女萬餘人來降庚戌幸隴州突厥可汗阿史那玷率其屬來降夏四月己亥勅總管刺史父母及子年十五已上不得將之官庚子以吏部尚書虞慶則爲尚書右僕射瀛州刺史楊尚希爲兵部尚書毛州刺史劉仁恩爲

刑部尚書甲辰以上柱國叱李長義為信州總管丁未宴
 突厥高麗吐谷渾使者於大興殿丁巳以上大將軍賀婁
 子幹為榆關總管五月癸酉契丹主莫賀弗遣使請降拜
 大將軍景子以柱國馮昱為汾州總管乙酉以汴州刺史
 弓仲泉為延州總管六月庚子降囚徒乙巳以鴻臚卿乙
 弗寔為翼州總管上柱國丘盧勳為夏州總管壬子開渠
 自渭達河以通運漕戊午秦王俊來朝秋七月景寅陳遣
 兼散騎常侍謝泉兼通直散騎常侍賀德基來聘八月甲
 午遣十使巡省天下戊戌衛王爽來朝是日以秦王俊納
 妃宴百寮班賜各有差壬寅上柱國大傅鄧國公竇熾薨

丁未宴秦王官屬賜物各有差壬子享陳使乙卯陳將夏
 侯苗請降上以通和納九月甲子幸襄國公主第乙丑
 幸霸水觀漕渠賜督役者帛各有差己巳上親錄囚徒庚
 午契丹內附甲戌駕幸洛陽關內飢也癸未太白晝見冬
 十月壬戌遣兼散騎常侍薛道衡通直散騎常侍丘盧
 寔使於陳癸亥以榆關總管賀婁子幹為雲州總管

五年春正月戊辰詔行新禮三月戊午以尚書左僕射高
 頴為左領軍大將軍上柱國宇文忻為右領軍大將軍夏
 四月甲午契丹主多彌遣使貢方物壬寅上柱國王誼謀
 反伏誅乙巳詔徵山東馬榮伯等六儒戊申車駕至自洛

陽五月甲申詔置義倉梁主蕭歸殂其太子琮嗣立遣上大將軍元契使于突厥阿波可汗秋七月庚申陳遣兼散騎常侍王詒兼通直散騎常侍阮卓來聘丁丑以上柱國宇文慶為涼州總管壬午突厥沙鉢略上表稱臣八月景戌沙鉢略可汗遣子庫合真特勒來朝甲辰河南諸州水遣民部尚書祁國公蘇威賑給之戊申有流星數百四散而下巳酉幸栗園九月丁巳至自栗園乙丑改鮑陂曰杜陂霸水為滋水陳將湛文徹寇和州儀同三司費寶首獲之景子遣兼散騎常侍李若兼通直散騎常侍崔君贍使於陳冬十月壬辰以上柱國楊素為信州總管朔州總管

吐萬緒為徐州總管十一月甲子以上大將源雄為朔州總管丁卯晉王廣來朝十二月丁未降囚徒戊申以上柱國達奚長儒為夏州總管

六年春正月甲子党項羌內附庚午班曆於突厥辛未以柱國韋洸為安州總管壬申遣民部尚書蘇威巡省山東二月乙酉山南荆浙七州水遣前工部尚書長孫毗賑恤之景戌制刺史上佐每歲暮更入朝上考課丁亥發丁男十一萬修築長城二旬而罷乙未以上柱國崔弘度為襄州總管庚子大赦天下三月巳未洛陽男子高德上書請上為太上皇傳位皇太子上曰朕承天命撫育蒼生日旰

孜孜猶恐不逮豈學近代帝王事不師古傳位於子自求
逸樂者哉癸亥突厥沙鉢略遣使貢方物夏四月己亥陳
遣兼散騎常侍周璠兼通直散騎常侍江椿來聘秋七月
辛亥河南諸州水乙丑京師雨毛如馬鬣尾長者二尺餘
短者六七寸八月辛卯關內七州旱免其賦稅遣散騎常
侍裴豪兼通直散騎常侍劉顓聘于陳戊申上柱國太師
申國公李穆薨閏月己酉以河州刺史段文振為蘭州總
管丁卯皇太子鎮洛陽辛未晉王廣秦王俊並來朝景宗
上柱國邠國公梁士彥上柱國杞國公宇文忻柱國舒國
公劉昉以謀反伏誅上柱國許國公宇文善坐事除名九

月辛巳上素服御射殿詔百寮射賜梁士彥三家資物景
戌上柱國宋安郡公元景山卒庚子以上柱國李詢為隄
州總管辛丑詔大象已來死事之家咸令賑恤冬十月己
酉以河北道行臺尚書令并州總管晉王廣為雍州牧餘
官如故兵部尚書楊尚希為禮部尚書癸丑置山南道行
臺尚書省於襄州以秦王俊為尚書令景辰以芳州刺史
駱平難為疊州刺史衡州總管周法尚為黃州總管甲子
甘露降于華林園

七年春正月癸巳有事于太廟乙未制諸州歲貢三人二
月丁巳祀朝日于東郊己巳陳遣兼散騎常侍王亨兼通

直散騎常侍王昶來聘壬申車駕幸醴泉宮是月發丁男
十萬餘修築長城二旬而罷夏四月己酉幸晉王第庚戌
於揚州開山陽瀆以通運漕突厥沙鉢略可汗卒其子維
虞閭嗣立是爲都藍可汗癸亥頒青龍符於東方總管刺
史西方以騶虞南方以朱雀北方以玄武甲戌遣兼散騎
常侍楊同兼通直散騎常侍崔儼使于陳以民部尚書蘇
威爲吏部尚書五月乙亥朔日有蝕之己卯雨石于武安
滏陽間十餘里秋七月己丑衛王爽弒死上發喪於門下外
省八月景午以懷州刺史源雄爲朔州總管庚申梁主蕭
琮來朝九月乙酉梁安平王蕭巖掠於其國以奔陳辛卯
廢梁國曲赦江陵以梁主蕭琮爲柱國封昌國公冬十一月
庚申行幸同州以先帝所居降囚徒矣亥幸蒲州景寅宴
父老上極懽曰此間人物衣服鮮麗容止閑雅良由仕宦
之鄉陶染成俗也十一月甲午幸馮翊親祠故社父老對
詔失旨上大怒免其縣官而去戊戌至自馮翊

帝紀第一

隋書一

帝紀第二

隋書二

特進臣魏

徵十一

高祖下

八年春正月乙亥陳遣散騎常侍袁祥兼通直散騎常侍
 周止水來聘二月庚子鎮星入東井辛酉陳人寇硤州三
 月辛未上柱國隴西郡公李詢卒壬申以成州刺史姜須
 達為會州總管甲戌遣兼散騎常侍程尚賢兼通直散騎
 常侍韋暉使于陳戊寅詔曰昔有苗不賓唐堯薄伐孫皓
 僭虐晉武行誅有陳竊據江表逆天暴物朕初受命陳頊
 尚存思欲教之以道不以龔其行為今往來脩睦望其遷善

時日無幾，豐惡已聞。厚納叛亡，侵犯城戍。勾吳閩越，肆厥殘忍。于時王師大舉，將一車書，陳頊反地，收兵深懷震懼。責躬請約，俄而致殞。矜其喪禍，仍詔班師。叔寶承風，因求繼好。載行克念，共敦行李。每見珪璋，入朝輜軒。出使何嘗不殷勤，曉喻戒以惟新。而狼子之心，出而彌野。威侮五行，急棄三正。誅翦骨肉，夷滅才良。據手掌之地，恣溪壑之險。劫奪閭閻，資產俱竭。驅蹙內外，勞役弗已。徵責女子，擅造宮室。日增月益，止足無期。惟薄嬪嬙，有踰萬數。寶釜食窮，奢極侈淫。聲樂飲俾，晝夜斬直言之客。滅無罪之家，剖人之肝，分人之血。欺天造惡，祭鬼求恩。歌舞衢路，酣醉宮

闈。盛粉黛而執干戈，曳羅綺而呼警蹕。躍馬振策，從日至昏。無所經營，馳走不息。負甲持仗，隨逐徒行。追而不及，即加罪譴。自古昏亂罕，或能比介士武夫。飢寒力役，筋髓罄於土木。性命俟於溝渠。君子潛逃，小人得志。家家隱殺戮，各各任聚斂。天災地孽，物怪人妖。衣冠鉗口，道路以目。傾心翹足，誓告於我日月。以冀文奏相尋，重以替德。違言搖蕩，疆場巴峽之下。海澨已西，江北江南。為鬼為蜮，死隴窮發掘之酷。生居極壤，斂之苦抄掠。人畜斷截，樵蘇市井不立。農事廢寢，麻陽廣陵。窺覩相繼，或謀圖城邑。或劫剝吏人。晝伏夜遊，鼠竄狗盜。彼則羸兵散卒，來必就擒。此則重門

設險有勞藩捍天之所覆無非朕臣每聞聽賢有懷傷惻
有梁之國我南藩也其君入朝潛相招誘不顧朕恩士女
深迫脅之悲城府致空虛之歎非直朕居人上懷此無忘
既而百辟屢以為言兆庶不堪其請豈容對而不誅忍而
不救近日秋始謀欲弔人益部樓船盡令東驚便有神龍
數十騰躍江流引伐罪之師向金陵之路船住則龍止船
行則龍去四日之內三軍皆覩豈非蒼昊愛人幽明展事
降神先路協贊軍威以上天之靈助戡定之方便可出師
授律應機誅殄在斯舉也永清吳越其將士糧仗水陸資
須期會進止一准別勅秋八月丁未河北諸州飢遣吏部

尚書蘇威賑恤之九月丁丑宴南征諸將頒賜各有差矣
己嘉州言龍見冬十月己亥太白出西方己未置淮南行
臺省於壽春以晉王廣為尚書冬辛酉陳遣兼散騎常侍
王琬兼通直散騎常侍許善心來聘拘留不遣甲子將伐
陳有事於太廟命晉王廣秦王俊清河公楊素並為行軍
元帥以伐陳於是晉王廣出六合秦王俊出襄陽清河公
楊素出信州荊州刺史劉仁恩出江陵宜陽公王世積出
蘄春新義公韓擒虎出廬江襄邑公賀若弼出吳州落叢公
燕榮出東海合總管九十兵五十萬八千皆受晉王節
度東接滄海西拒巴蜀旌旗舟楫橫亘數千里曲赦陳國

有星孛于牽牛十一月丁卯車駕餞師詔購陳叔寶位上柱國萬戶公乙亥行幸定城陳師誓衆景子幸河東十二月庚子至自河東

九年春正月己巳白虹夾日辛未賀若弼拔陳京口韓擒虎拔陳豫州癸酉以尚書右僕射虞慶則為右衛大將軍景子賀若弼敗陳師於蔣山獲其將蕭摩訶韓擒虎進師入建鄴獲其將任蠻奴獲陳主叔寶陳國平合州三十郡一百縣四百癸巳遣使持節巡撫之二月乙未廢淮南行臺省景申制五百家為鄉正一人百家為里長一人丁酉以襄州總管韋世康為安州總管夏四月己亥幸驪山親勞

旋師乙巳三軍凱入獻俘於太廟拜晉王廣為太尉庚戌上御廣陽門宴將士頒賜各有差辛亥大赦天下己未以陳都官尚書孔範散騎常侍王瑳王儀御史中丞沈觀等邪佞於其主以致亡滅皆投之邊裔辛酉以信州總管楊素為荊州總管吏部侍郎宇文弼為刑部尚書宗正少卿楊昇為工部尚書壬戌詔曰往以兵越之野羣黎塗炭干戈方用積習未寧今率土大同含生遂性太平之法方可流行凡我臣僚澡身浴德開通耳目宜從茲始喪亂已來緬將十載君無君德臣失臣道父有不慈子有不孝兄弟之情或薄夫婦之義或違長幼失序尊卑錯亂朕為帝王

志存愛養時有臻道不敢寧息內外職位遐邇黎人家
自修人人克念使不軌不法蕩然俱盡兵可立威不可不
戢刑可助化不可專行禁衛九重之餘鎮守四方之外戎
旅軍器皆宜停罷伐路旣夷羣方無事武力之子俱可學
文人間甲仗悉皆除毀有功之臣降情文藝家門子姪各
守一經令海內翕然高山仰止京邑庠序爰及州縣生徒
受業并進於朝未有灼然明經高第此則教訓不篤考課
未精明勅所由隆茲儒訓官府從宦丘園素士心迹相表
實弘為念勿為跼促乖我皇猷朕君臨區宇於茲九載開
直言之路披不諱之心形於顏色勞於興寢自頃廷藝論

功昌言乃衆推誠切諫其事甚踈公卿士庶非所望也各
啓至誠匡茲不逮見善必進有才必舉無或噤嘿退有後
言頒告天下咸悉此意閏月甲子以安州總管韋世康為
信州總管丁丑頒木魚符於總管刺史雌一雄一巳卯以
吏部尚書蘇威為尚書右僕射六月乙丑以荊州總管楊
素為納言丁丑以吏部侍郎盧愷為禮部尚書時朝野物
議咸願登封秋七月景午詔曰豈可命一將軍除一小國
遐邇注意便謂太平以薄德而封名山用虛言而干上帝
非朕攸聞而今以後言及封禪宜即禁絕八月壬戌以廣
平王雄為司空冬十一月壬辰考使定州刺史巨盧通等

上表請封禪上不許庚子以右衛大將軍虞慶則為右武
候大將軍右領軍將軍李安為右領軍大將軍甲寅降囚
徒十二月甲子詔曰朕祇承天命清蕩萬方百王衰敝之
後兆庶澆浮之日聖人遺訓掃地俱盡制禮作樂今也其
時朕情存古樂深思雅道鄭衛淫聲魚龍雜戲樂府之內
盡以除之今欲更調律呂改張琴瑟且妙術精微非因教
習工人代掌止傳糟粕不足達神明之德論天地之和區
域之間竒才異議天知神授何代無哉蓋晦迹於非時侯
昌言於所好宜可搜訪遠以奏聞庶觀一藝之能共就九
成之業仍詔太常牛弘通直散騎常侍許善心秘書丞

察通直郎虞世基等議定作樂已巳以黃州總管周法尚
為永州總管

十年春正月乙未以皇孫昭為河南王楷為華陽王二月
庚申幸并州夏四月辛酉至自并州五月乙未詔曰魏
末喪亂寓縣瓜分役車歲動未遑休息兵士軍人權置坊
府南征北伐居處無定家無完堵地罕包桑恒為流寓之
人竟無鄉里之號朕甚愍之凡是軍人可悉屬州縣墾田
籍帳一與民同軍府統領宜依舊式罷山東河南及北方
緣邊之地新置軍府六月辛酉制人年五十免役收庸癸
亥以靈州總管王世積為荊州總管浙州刺史元胄為靈

州總管秋七月癸卯以納言楊素為內史令庚戌上親錄
囚徒辛亥高麗遼東郡公高陽卒壬子吐谷渾遣使來朝
八月壬申遣柱國襄陽郡公暹洸上開府東萊郡公王景
並持節巡撫嶺南百越皆服冬十月甲子頒木魚符於京
師官五品已上戊辰以永州總管周法尚為桂州總管十
一月辛卯幸國學頒賜各有差景午契丹遣使朝貢辛丑
有事於南郊是月婺州人汪文進會稽人高智慧蘇州人
沈玄愴皆舉兵反自稱天子署置百官樂安蔡道人蔣山
李稜饒州吳代華永嘉沈孝澈泉州王國慶餘杭楊寶英
交趾李春等皆自稱大都督攻陷州縣詔上柱國內史令

越國公楊素討平之

十一年春正月丁酉以平陳所得古器多為妖變悉命毀
之辛丑高麗遣使朝貢景午皇太子妃元氏薨上舉哀於
文思殿二月戊午吐谷渾遣使貢方物以大將軍蘇孝慈
為工部尚書景子以臨穎令劉曠治術尤異擢為豈州刺
史己卯突厥遣使獻七寶盤辛巳晦日有蝕之三月壬午
遣通事舍人若干洽使于吐谷渾癸未以幽州總管周搖
為壽州總管朔州總管吐萬緒為夏州總管夏四月戊午
突厥雍虞閭可汗遣其特勒來朝五月甲子高麗遣使貢
方物癸卯詔百官悉詣朝堂上封事乙巳以右衛將軍元旻

爲左衛大將軍秋七月己丑以柱國杜彥爲洪州總管八月壬申幸栗園滕王瓚薨乙亥至自栗園上柱國沛國公鄭譯卒十二月景辰靺鞨遣使貢方物

十二年春正月壬子以蘇州刺史皇甫績爲信州總管宣州刺史席代雅爲廣州總管二月己巳以蜀王秀爲內史令兼右領軍大將軍漢王諒爲雍州牧右衛大將軍夏四月辛卯以壽州總管周搖爲襄州總管五月辛亥廣州總管席代雅卒秋七月乙巳尚書右僕射邳國公蘇威禮部尚書容城縣侯盧愷並坐事除名壬戌幸昆明池其日還宮己巳有事於太廟壬申晦日有蝕之八月甲戌制天下

死罪諸州不得便決皆令大理覆治乙亥幸龍首池癸巳制宿衛者不得輒離所守丁酉上柱國夏州總管楚國公豆盧勳卒戊戌上親錄囚徒九月丁未以工部尚書楊異爲吳州總管冬十月丁丑以遂安王集爲衛王壬午有事于太廟至太祖神主前上流涕嗚咽悲不自勝十一月辛亥有事於南郊壬子宴百寮頒賜各有差己未上柱國新義郡公韓擒虜率衆以豫州刺史權武爲潭州總管甲子百寮大射於武德殿十二月癸酉突厥遣使來朝乙酉以上柱國內史令楊素爲尚書右僕射己酉吐谷渾靺鞨並遣使貢方物

十三年春正月乙巳上柱國郇國公韓達業卒景午契丹
奚靈臺章並遣使貢方物壬子親祀感帝己未以信州總
管韋世康爲吏部尚書壬戌行幸岐州二月景子詔營仁
壽宮丁亥至自岐州戊子宴考使於嘉則殿己卯立皇孫
暕爲豫章王戊子晉州刺史南陽郡公賈悉達隰州總管
撫寧郡公韓延等以賄伏誅己丑制坐事去官者配流一
年丁酉制私家不得隱藏緯候圖讖夏四月癸未制戰亡
之家給復一年五月癸亥詔之間有撰集國史臧否人物
者皆令禁絕秋七月戊申鞞勅遣使貢方物壬子左衛大
將軍雲州總管鉅鹿郡公賀婁子幹卒丁巳幸昆明池戊
華陽郡公梁彥先卒

辰晦日有蝕之九月景辰降囚徒庚申以邵國公楊綸爲
滕王乙丑以柱國杜彥爲雲州總管冬十月乙卯上柱國
華陽郡公梁彥先卒
十四年夏四月乙丑詔曰在昔聖人作樂崇德移風易俗
於斯爲大自晉氏播遷兵戈不息雅樂流散年代已多四
方未一無由辨正賴上天鑒臨明神降福拯茲塗炭安息
蒼生天下大同歸於治理遺文舊物皆爲國有此命所司
總令研究正樂雅聲詳考已訖宜即施用見行者傳人間
音樂流僻日久棄其舊體競造繁聲浮宕不歸遂以成俗
宜加禁約務存其本五月辛酉京師地震關內諸州旱六

月丁卯詔省府州縣皆給公廩田不得治生與人爭利秋
七月乙未以邳國公蘇威為納言八月辛未關中大旱人
飢上率戶口就食於洛陽九月己未以齊州刺史樊子蓋
為循州總管丁巳以基州刺史崔仲方為會州總管及閏
十月甲寅詔曰齊梁陳往皆創業一方綿歷年代既宗祀
廢絕祭奠無主興言矜念良以愴然莒國公蕭琮及高仁
英陳叔寶等宜令以時脩其祭祀所須器物有司給之乙
卯制外官九品已上父母及子年十五已上不得將之官
十一月壬戌制州縣佐吏三年上代不得重任癸未有星
孛于角亢十二月乙未東巡狩

十五年春正月壬戌車駕次齊州親問疾苦景寅旅王符
山庚午上以歲旱祠太山以謝衍咎大赦天下二月景辰
收天下兵器敢有私造者坐之關中緣邊不在其例丁巳
上柱國蔣國公梁睿卒三月己未至自東巡狩望祭五嶽
海濱丁亥幸仁壽宮營州總管韋藝卒夏四月己丑朔大
赦天下甲辰以趙州刺史楊達為工部尚書丁未以開府
儀同三司韋冲為營州總管五月癸酉吐谷渾遣使朝貢
丁亥制京官五品已上佩銅魚符六月戊子詔鑿底柱庚
寅相州刺史豆盧通首綾文布命焚之於朝堂乙未林邑
遣使來貢方物辛丑詔名山大川未在祀典者悉祠之秋

七月乙丑晉王諱獻毛龜甲戌遣邳國公蘇威巡省江南
戊寅至自仁壽宮辛巳制九品已上官以理去職者聽並
執笏冬十月戊子以吏部尚書韋世康為荊州總管十一
月辛酉幸溫湯乙丑至自溫湯十二月戊子勅盜邊糧一
升已上皆斬並籍沒其家己丑詔文武官以四考交代
十六年春正月丁亥以皇孫裕為平原王筠為安成王疑
為安平王恪為襄城王該為高陽王詔為建安王暕為潁
川王夏五月丁巳以懷州刺史龐晃為夏州總管蔡陽縣
公姚辯為靈州總管六月甲午制工商不得進仕并州大
蝗辛丑詔九品已上妻五品已上妾夫亡不得改嫁秋八

月景成詔決死罪者三奏而後行刑冬十月己丑幸長春
宮十一月壬子至自長春宮

十七年春二月癸未太平公史國歲擊西澤美平之庚寅
幸仁壽宮庚子上柱國王世積討桂州賊李光仕平之壬
寅河東王昭納妃宴羣臣頒賜各有差三月景辰詔曰分
職設官共理時務班位高下各有等差若所在官人不相
敬憚多自寬縱事難克舉諸有殿失雖備科條或據律乃
輕論情則重不即決罪無以懲肅其諸司論屬官若有愆
犯聽於律外斟酌決杖辛酉上親錄囚徒於亥上柱國袁
國公劉昶以罪伏誅庚午遣治書侍御史柳或皇甫誕巡

省河南河北夏四月戊寅頒新曆壬午詔曰周曆告終羣
 凶作亂豐起蕃服毒被生人朕受命上玄廓清區宇聖靈
 垂祐文武同心申明公穆鄭襄公孝寬廣平王雄蔣國公
 睿楚國公勳齊國公頰越國公素魯國公慶則新寧公長
 义宜陽公世積趙國公羅雲隴西公詢廣業公景真昌公
 振沛國公譚項城公子相鉅鹿公子幹等登庸納揆之時
 草昧經綸之日丹誠大節心盡帝圖茂績殊勲力宣王府
 宜弘其門緒與國同休其世子世孫未經州任者宜量才
 升用庶享榮位世祿無窮五月宴百寮於玉女泉頒賜各
 有差已巳蜀王秀來朝高麗遣使言其方物甲戌以左衛將

軍獨孤羅雲為涼州總管閏月己卯羣鹿入殿門馴擾侍
 衛之內秋七月丁丑桂州人李代賢反遣右武侯大將軍
 虞慶則討平之丁亥上柱國并州總管秦王俊坐事免以
 王就第戊戌突厥遣使貢方物八月丁卯荊州總管上庸
 郡公韋世康卒九月甲申至自仁壽宮庚寅上謂侍臣曰
 禮主於敬皆當盡心黍稷泝馨貴在祗肅廟庭設樂本以
 迎神齋祭之日觸目多感當此之際何可為心在路奏樂
 禮未為允羣公卿士宜更詳之冬十月丁未頒銅獸符於
 驃騎車騎府戊申道王靜慶庚午詔曰五帝異樂三王殊
 禮皆隨事而有損益因情而立節文仰惟祭享宗廟瞻敬

如在天極之感情深茲日而禮畢升路鼓吹發音還入宮
門金石振響斯則哀樂同日心事相違情所不安理實未
允宜改茲往式用弘禮教自今已後享廟日不須備鼓吹
殿庭勿設樂懸辛未京師大索十一月丁亥突厥遣使來
朝十二月壬子上柱國右武侯大將軍魯國公虞慶則以
罪伏誅

十八年春正月辛丑詔曰吳越之人徃承敝俗所在之處
私造大船因相聚結致有侵害其江南諸州人間有船長
三丈已上悉括入官二月甲辰幸仁壽宮乙巳以漢王諒
為行軍元帥水陸三十萬伐高麗三月乙亥以柱國杜彥

為朔州總管夏四月癸卯以將州刺史郭行為洪州總管
五月辛亥詔畜猫鬼蠱毒厥魅野道之家投於四裔六月
景寅下詔黜高麗王高元官爵秋七月壬申詔以河南八
州水免其課役景子詔京官五品已上總管刺史以志行
修謹清平幹濟二科舉人九月己丑漢王諒師遇疾疫而
旋死者十八九庚寅勅舍客無公驗者坐及刺史縣令辛
卯至自仁壽宮又十一月甲戌上親錄囚徒癸未有事於
南郊十二月庚子上柱國夏州總管任城郡公王景以罪
伏誅是月自京師至仁壽宮置行宮十有二所

十九年春正月癸酉大赦天下戊寅大射武德殿宴賜

官二月己亥晉王諱來朝辛丑以并州總管長史宇文弼
為朔州總管甲寅幸仁壽宮夏四月丁酉突厥利可汗內
附達頭可汗犯塞遣行軍總管史萬歲擊破之六月丁酉
以豫章王暕為內史今秋八月癸卯上柱國尚書左僕射
齊國公高頴坐事免辛亥上柱國皖城郡公張威卒甲寅
上柱國城陽郡公李徹卒九月乙丑以太常卿牛弘為吏
部尚書夏十月甲午以突厥利可汗姓啓人可汗築大利
城處其部落庚子以朔州總管宇文弼為代州總管十二
月乙未突厥都藍可汗為部下所殺丁丑星竇於勃海
二十年春正月辛酉朔上在仁壽宮突厥高麗契丹並遣

使貢方物癸亥以代州總管宇文弼為吳州總管二月己巳上柱國
崔弘度為原州總管丁丑無雲而雷三月辛卯熙州人李英林反遣行
軍總管張衡討平之夏四月壬戌突厥犯塞以晉王廣為行軍元
帥擊破之乙亥天有聲如瀉水自南而北六月丁丑秦王俊薨秋八月
老人星見九月丁未至自仁壽宮癸丑吳州總管楊昇卒冬十月己未
太白晝見乙丑皇太子勇及諸子並廢為庶人殺柱國太
平縣公史萬歲己巳殺左衛大將軍五原郡公元旻十一
月戊子天下地震京師大風雪以晉王廣為皇太子十二
月戊午詔東宮官屬不得稱臣於皇太子辛巳詔曰佛法
深妙道教虛融咸降大慈濟度群品凡在含識皆蒙覆護

所以雕鑄靈相圖寫真形率土瞻仰用申誠敬廿五嶽四
鎮節宣雲雨江河淮海浸潤區域並生養萬物利益兆人
故建廟立祀以時恭敬敢有毀壞偷盜佛及天尊像嶽鎮
海濱神形者以不道論沙門壞佛像道士壞天尊者以惡
逆論

仁壽元年春正月乙酉朔大赦改元以尚書右僕射楊素
為尚書左僕射納言蘇威為尚書右僕射丁酉徙河南
王昭為晉王突厥寇恒安遣柱國韓洪擊之官軍敗績以
晉王昭為內史令辛丑詔曰君子立身雖云百行唯誠與
孝最為其首故投主殉節自古稱難殞身王事禮加二等而

代俗之徒不達大義至於致命戎旅不入兆域虧孝子之
意傷人臣之心興言念此每深愍歎且入廟祭祀並不廢
闕何止墳塋獨在其外自今已後戰亡之徒宜入墓域二
月乙卯朔日有蝕之辛巳以上柱國獨孤楷為原州總管
三月壬辰以豫章王暕為揚州總管夏四月以浙州刺史
蘇孝慈為洪州總管五月己丑突厥男女九萬口來降壬辰
驟雨震雷大風拔木宜君秋水移於始平六月癸丑洪州
總管蘇孝慈卒乙卯遣十六使巡省風俗乙丑詔曰儒學
之道訓教生人識父子君臣之義知尊卑長幼之序升之
於朝任之以職故能贊理時務弘益風範朕撫臨天下思

弘德教延集學徒崇庠序開進仕之路行賢雋之人而國學胄子垂將千數州縣諸生成亦不少徒有名錄空度歲時未有德爲代範才任國用良由設學之理多而未精今宜簡省明加獎勵於是國子學唯留學生七十人太學四門及州縣學並廢其日頒舍利於諸州秋七月戊戌改國子爲太學九月癸未以柱國杜彥爲雲州總管十一月己丑有事於南郊壬辰以資州刺史衛玄爲遂州總管

二年春二月辛亥以荊州刺史侯莫陳穎爲桂州總管宗正楊祀爲荊州總管三月己亥幸仁壽宮壬寅以齊州刺史張喬爲潭州總管夏四月庚戌岐雍二州地震秋七月

景成詔內外官冬舉所知戊子以原州總管獨孤楷爲益州總管八月己巳皇后獨孤氏崩九月景成至自仁壽宮壬辰河南北諸州大水遣工部尚書楊達賑恤之乙未上柱國襄州總管金水郡公周搖卒隴西地震冬十月壬子曲赦益州管內癸丑以工部尚書楊達爲納言閏月甲申詔尚書左僕射楊素與諸術者刊定陰陽舛謬己丑詔曰禮之爲用時義太矣黃琮蒼璧降天地之神粢盛牲食展宗廟之敬正父子君臣之序明婚姻喪紀之節故道德仁義非禮不成安上治人莫善於禮自區宇亂離繇歷年代王道衰而變風作微言絕而大義乖與代推移其弊日甚

至於四時郊祀之節文五服麻葛之隆殺是非異說踳駁殊塗致使聖教凋訛輕重無准朕祇承天命撫臨生人當洗滌之時屬干戈之代克定禍亂先運武功刪正彝典日不暇給今四海乂安五戎勿用理宜弘風訓俗導德齊禮綴往聖之舊章興先王之茂則尚書左僕射越國公楊素尚書右僕射邳國公蘇威吏部尚書竒章公李弘內史侍郎薛道衡祕書丞許善心內史舍人虞世基著作郎王劼或任君端揆博達古今或器推令望學綜經史委以裁緝實允僉議可並修定五禮壬寅葬獻皇后於太陵十二月癸巳上柱國益州總管蜀王秀廢為庶人交州人李佛子舉兵反遣行軍總管劉方討平之

三年春二月己卯原州總管比陽縣公龐晃卒戊子以大將軍蔡陽郡公姚辯為左武侯大將軍夏五月癸卯詔曰哀哀父母生我劬勞欲報之德昊天罔極但風樹不靜嚴敬莫追霜露既降感思空切六月十三日是朕生日宜令海內為武元皇帝元明皇后斷屠六月甲午詔曰禮云至親以菽斷蓋以四時之變易萬物之更始故聖人象之其有三年加隆爾也但家無二尊母為厭降是以父存喪母還服于菽者服之正也豈容菽內而更小祥然三年之喪而有小祥者禮云菽祭禮也菽而除喪道也以是之故雖

未再暮而天地一變不可不祭不可不除故有練焉以存
喪祭之本然暮喪有練於理未安雖云十一月而練乃無
所法象非暮非時豈可除祭而儒者徒擬三年之喪立練
禫之節可謂苟存其變而失其本欲漸於奪乃薄於喪致
使子則冠練去經黃裏縗緣經則布葛在躬麤服未改豈
非經哀尚存子情已奪親踈失倫輕重顛倒乃不順人情
豈聖人之意也故知先聖之禮廢於人邪三年之喪尚有
不行之者至於祥練之節安能不墜者乎禮云父母之喪
無貴賤一也而大夫士之喪父母乃貴賤異服然則禮壞
樂崩由來漸矣所以晏平仲之斬麤縗其老謂之非禮滕

文公之服三年其臣咸所不欲蓋由王道既衰諸侯異政
將踰越於法度惡禮制之害已乃滅去篇籍自制其宜遂
至骨肉之恩輕重從俗無易之道隆殺任情況孔子沒而
微言隱秦滅學而經籍焚者乎有漢之興雖求儒雅人皆
異說義非一貫又近代亂離唯務兵革其於典禮時所未
遑夫禮不從天降不從地出乃人心而已者謂情緣於恩
也故恩厚者其禮隆情輕者其禮殺聖人以是稱情立文
別親踈貴賤之節自臣子道消上下失序莫大之恩逐情
而薄莫重之禮與時而殺此乃服不稱喪容不稱服非所
謂聖人緣恩表情制禮之義也然喪與易也寧在於戚則

禮之本也禮有其餘未若於哀則情之實也今十一月而練者非禮之本非情之實由是言之父存喪母不宜有練但依禮十三月而祥中月而禫庶以合聖人之意達孝子之心秋七月丁卯詔曰日往月來唯天所以運序山鎮川流唯地所以宣氣運序則寒暑無差宣氣則雲雨有作故能成天地之大德育萬物而為功况一人君子四海睹物欲運獨見致治不藉群才未之有也是以唐堯欽明命羲和以居岳虞舜獻德升元凱而作相伊尹鼎俎之賡為殷之阿衡呂望漁釣之夫為周之尚父此則鳴鶴在陰其子必和風雲之從龍虎賢哲之應聖明君德不回臣道以正

故能通天地之和順陰陽之序豈不由元首而有股肱乎自王道衰人風薄居上莫能公道以御物為下必踵私法以希時上下相蒙君臣義失義失則政乖政乖則人困蓋同德之風難嗣離德之軌易追則任者不休休者不任則衆口鑠金戮辱之禍不測是以行歌避代辭位灌園卷而可懷黜而無愠放逐江湖之上沈赴河海之流所以自縶而不悔者也至於閭閻秀異之士鄉曲博雅之儒言足以佐時行足以勵俗遺棄於草野堙滅而無聞豈勝道哉所以覽古而歎息者也方今區宇一家煙火萬里百姓乂安四夷賓服豈是人功實乃天意朕惟夙夜祗懼將所以上嗣

明靈是以小心勵己日慎一日以黎元在念憂兆庶未康以庶政爲懷慮一物失所雖求傳巖莫見幽人徒想崆峒未聞至道唯恐商歌於長夜抱關於夷門遠跡犬羊之間屈身僮僕之伍其令州縣搜揚賢哲皆取明知今古通識治亂究政教之本達禮樂之源不限多少不得不舉限以三旬咸令進路徵召將送必須以禮八月壬申上柱國檢校幽州總管落叢郡公燕榮以罪伏誅九月壬戌置常平官甲子以營州總管韋冲爲民部尚書十二月癸酉河南諸州水遣納言楊達賑恤之

四年春正月景辰大赦甲子幸仁壽宮乙丑詔賞罰支度

事無巨細並付皇太子夏四月乙卯上不豫六日庚申大赦天下有星入月中數日而退長人見於鴈門秋七月乙未日青無光八日乃復己亥以大將軍段文振爲雲州總管甲辰上以疾甚卧於仁壽宮與百寮辭訣並握手歎歎丁未崩於大寶殿時年六十四遺詔曰嗟乎自昔晉室播遷天下喪亂四海不一以至周齊戰爭相尋年將三百故割疆土者非一所稱帝王者非一人書軌不同生人塗炭上天降鑒爰命於朕用登大位豈關人力故得撥亂反正偃武修文天下大同聲教遠被此又是天意欲寧區夏所以昧旦臨朝不敢逸豫一日萬機留心親覽晦明寒暑不

憚劬勞匪曰朕日蓋為百姓故也王公卿士每日闕庭刺史
以下三時朝集何嘗不罄竭心府誠勅殷勤義乃君臣情
兼父子庶藉百寮智力萬國歡心欲令率土之人永得安
樂不謂遘疾彌留至於大漸此乃人生常分何足言及但
四海百姓衣食不豐豈教化政刑猶未盡善興言念此唯以
留恨朕今年踰六十不復稱夭但筋力精神一時勞竭如
此之事本非為身止欲安養百姓所以致此人生子孫誰
不愛念既為天下事須割情勇及秀等並懷悖惡既知無
臣子之心所以廢黜古人有言知臣莫若於君知子莫若
於父若令勇秀得志共治家國必當戮辱徧於公卿酷毒

流於人庶今惡子孫已為百姓黜屏好子孫足堪負荷大
業此雖朕家事理不容隱前對文武侍衛具已論述且夫
子廣地居上嗣仁孝著聞以其行業堪成朕志但令內外
群官同心戮力以此共治天下朕雖瞑目何所復恨但國
家事大不可限以常禮既葬公除行之自昔今宜遵田疇
勞改定凶禮所須纔令周事務從節儉不得勞人諸州總
管刺史已下宜各率其職不須奔赴自古哲王因人作法
前帝後帝公革隨時律令格式或有不便於事者宜依前
勅修改務當政要嗚呼敬之哉無墜朕命乙卯發喪河間
揚柳四株無故黃落既而花葉復生八月丁卯梓宮至自

仁壽宮景子殞于大興前殿冬十月己卯合葬於大陵同
墳而異穴上性嚴重有威容外質木而內明敏有大略初
得政之始羣情不附諸子幼弱內有六王之謀外致三方
之亂握強兵居重鎮者皆周之舊臣上推以赤心各展其
用不踰朞月克定二邊未及十年平一四海薄賦歛輕刑
罰內脩制度外撫戎夷每旦聽朝日昃志倦居處服翫務
存節儉令行禁止上下化之開皇仁壽之間丈夫不衣綾
綺而無金玉之飾常服率多布帛裝帶不過以銅鐵骨角
而已雖膏於財至於賞賜有功亦無所愛恠乘輿四出路
逢上表者則駐馬親自臨問或潛遣行人採聽風俗吏治

得失人間疾苦無不留意嘗遇關中飢遣左右視百姓所
食有得豆屑雜糠而奏之者上流涕以示羣臣深自咎責
爲之撤膳不御酒肉者殆將一朞及東拜太山關中戶口
就食洛陽者道路相屬上勅斥候不得輒有驅逼男女參
廁於仗衛之間逢扶老携幼者輒引馬避之慰勉而去至
艱險之處見負擔者遽令左右扶助之其有將士戰沒必
加優賞仍令使者就家勞問自強不息朝夕孜孜人庶殷
繁帑藏充實雖未能臻於至治亦足稱近代之良主然天
性沉猜素無學術好爲小數不達大體故忠臣義士莫得
盡心竭辭其草創元勳及有功諸將誅夷罪退罕有存者

又不悅詩書廢除學校唯婦言是用廢黜諸子逮于暮年持法尤峻喜怒不常過於殺戮嘗令左右送西域朝貢使出玉門關其所經之處或受牧宰小物饋遺鸚鵡鷹皮馬鞭之屬上聞而大怒又詣武庫見署中蕪穢不治於是執武庫令及諸受遺者出開遠門外親自臨決死者數十人又往往潛令人賂遺令史府史有受者必死無所寬貸議者以此少之

史臣曰高祖龍德在田竒表見異晦明藏用故知我者希始以外戚之尊受託孤之任與能之議未爲當時所許是以周室舊臣感懷憤惋既而王謙固三蜀之阻不踰暮月

尉迴舉全齊之衆一戰而亡斯乃非止人謀抑亦天之所贊也乘茲機運遂遷周鼎于時蠻夷猾夏荆揚未一劬勞日昊經營四方樓船南邁則金陵失險驃騎北指則單于款塞職方所載並入疆理禹貢所圖咸受正朔雖晉武之克平吳會漢宣之推亡固存比義論功不能尚也七德既敷九歌已洽要荒咸暨尉候無壑於是躬節儉平徭賦倉廩實法令行君子咸樂其生小人各安其業強無陵弱衆不暴寡人物殷阜朝野歡娛二十年間天下無事區宇之內晏如也考之前王足以參蹤盛烈但素無術學不能盡下無寬仁之度有刻薄之資暨乎暮年此風逾扇又雅好

符瑞暗於大道建彼維城權侷京室皆同帝制靡所適從
聽哲婦之言惑邪臣之說溺寵廢嫡託付失所滅父子之
道開昆弟之隙縱其尋斧翦伐本枝墳土未乾子孫繼踵
屠戮松檟絕列天下已非隋有惜哉迹其衰息之源稽其
亂亡之兆起自高祖成於煬帝所由來遠矣非一朝一夕
其不祀忽諸未爲不幸也

卷第二

隋書二

書